

Kōrero

Pānui

Tuhituhi

Pāngarau

Tau 4

Kua waihangatia Ngā Whanaketanga Rumaki Māori kia mōhio ai tātou kei whea tō tamaiti i roto i ngā mahi ako i Te Reo Matatini me te Pāngarau.

E hāngai pū ana ngā whanaketanga ki te Marautanga o Aotearoa, ko te whakaako i ngā wāhanga ako katoa, arā – Te Reo Māori, te Pāngarau, te Pūtaiao, ngā Tikanga ā-Iwi, te Hauora, Ngā Toi, Te Reo Ingarahi me te Hangarau.

Me mātua whakarato te kura o tō tamaiti i ētahi pūrongo ā-tuhi e rua i te iti rawa ki a koe i ia tau. Mā aua pūrongo koe e whakamōhio e rere pēhea ana tō tamaiti i runga anō i Ngā Whanaketanga me te Marautanga. Mā te kura hoki tana kōpaki mahi e homai, heoi ki te kore, tonoa te kaiako kia whakaatu mai i ētahi tauira o ana mahi.

Mō te pukaiti nei, kua kapohia ngā momo akoranga a tō tamaiti i tana tau tuawhā i te kura – ā-kōrero, ā-panui, ā-tuhituhi, ā-pāngarau anō hoki. He kaponga noa iho ēnei e kite ai koe e pēhea ana ōna mōhiotanga, ōna āheinga hoki i roto i ēnei wāhanga ako.

Mēnā kua uru atu tō tamaiti i nā tata ake ki roto i te mātauranga rumaki ki te reo Māori, tērā pea ka paku rerekē te āhua e aromatawaihia ai – hei whakaata i tōna roa i roto i te mātauranga rumaki. Kōrero ki tō kaiako mēnā he āwangawanga ōu – māna e whakamārama ki a koe kei te pēhea te haere o āna mahi ako.





Kōrero

I te tau tuawhā i te kura, ko te reo kōrero o tō tamaiti kei te taumata 2 o te marautanga.

Ka pakari tonu tana kōrero e pā ana ki ngā horopaki o ia rā me ana wheako whaiaro hoki, pērā i te hī ika me koro, te hoko kai me pāpā, te kapa haka rānei.

E ako ana tō tamaiti ki te:

- kapo i te ariā matua o tētahi kōrero e rongō ana ia
- kōrero kia mārama ōna whakaaro, kia tika hoki te whakahua kupu i te nuinga o te wā
- tuku mihi i ngā horopaki e tika ana
- whakamahi i ngā kupu hei whakaahua i te āhua o te tangata, te wāhi, te mahi rānei.

He tauira o ngā mahi kōrero, mahi whakarongo

- Ka tonoa ia e te kaiako kia kōrero mō tētahi mahi toi nāna anō i waihanga mai – “He aha te take i waihangatia ai tō mahi toi?”, “He aha koe i kōwhiri ai i aua tae?”, “He aha te kaupapa o te mea i waihangatia?”

Mā ana hoa pea e whakahoki kōrero ki a ia –

“Ko ngā āhuatanga pai o tō mahi toi ki ahau, ko te ...”,

“Ko ngā kare ā-roto kua pupū ake i taku kitenga atu, ko te ...”

I te kāinga

- Kia ihiihi tonu te āhua o ō kōrero paki – me taki koe i tētahi tino kōrero, me pānui ā-waha i tētahi tino pukapuka, me tito paki hou rānei.
- Whakatītinahia tō tamaiti ki te mahi toi – whakaritea mai he pepa, he pene, he peita, he kutikuti, he wūru, he moheni. Akiakihia ia kia kōrero mō āna mahi – “Kei te hanga koe i te aha?”, “Kōrero mai ki ahau, he aha pea tana āhua?”
- Haria ia ki te whare pupuri taonga, te whare kararehe, te ngahere rānei – kawea atu tētahi papakupu, tētahi taupānga rānei hei āwhina i te kimi kupu hou.

Pānui

I te tau tuawhā i te kura, ko te reo pānui o tō tamaiti kei te taumata 2 o te marautanga. E pānui ana ia i ngā pukapuka o te Kete Pīngao.

E taea ana e tō tamaiti te pānui hei whakaea i ētahi kaupapa whāiti, pēnei i te rapu pārongo, i te rapu whakautu ki ētahi pātai, hei mahi pārekareka noa iho rānei māna. E āta whakaaro ana ki ngā mea e pānui ana ia, me te matapae i ngā whakakapinga, te whiriwhiri rānei e pēhea ana ngā kare ā-roto o ngā kiripuaki.

E ako ana tō tamaiti ki te:

- taki kōrero paki, me te whakaraupapa i ngā ariā matua, te whakauru haere anō hoki i ngā kupu, i ngā kiānga mai i te tuhinga
- matapaki i te reo peha i te horopaki tika – te kīwaha, te whakataukī, te kupu whakarite, te whakatangata, te huahuatau
- tautohu i te reo hāngū i roto i te tuhinga – ‘Ka mihia anō ia e tōna hoa.’
- kite i te tikanga, ki te matapaki hoki i te reo whakaahua me te reo whakataurite i roto i te tuhinga
- aro ki ngā tīwhiri o roto i te tuhinga hei whakatau i ngā āhuatanga tuakiri o tētahi kiripuaki me ngā mea e whakakipakipa i a ia.

Kua wehewehe ngā pukapuka ki roto ‘Kete’. Tīmata ana ki te Kete Harakeke – he māmā, he poto te tuhinga. Ka piki ake ki te Kete Kīkie, ka piki anō ki te Kete Pīngao, ā, ki te Kete Miro rā anō. Kei ia pikinga kete ka uaua ake, ka matatini ake te tuhinga. Hei tana tau tuarima i te kura, ko te tikanga e pānui ana tō tamaiti i ngā pukapuka matatini ake o te Kete Pīngao.



Ko ētahi āhuatanga o te pukapuka Pīngao i tēnei reanga

- Ngā whakawhitinga kōrero a ngā kiripuaki.
- Ngā pikitia he iti iho te hāngai ki ngā kupu kōrero.
- Te whānuitanga atu o ngā momo kiripuaki.
- Ngā momo tīmatanga rerenga huhua nei.
- He tauira o ngā momo kārawarawatanga matatini.

I tō tamaiti e pānui ana i tēnei kōrero, tērā pea ka:

- pānuitia e ia te tīmatanga o te tuhinga, ka matapae ai he aha te kaupapa, ā, ka pēhea hoki te whakakapinga
- kōrerohia pēhea nei te haere i te pō ki a ia
- whakaaro ake ki tētahi wā i hāereere ai ia i te pō
- matapakia e ia ngā āhuatanga pai me ngā āhuatanga kāore i te tino pai o te haere pō.

I te kāinga

- Uiuia tō tamaiti he aha ngā pukapuka e pānuitia ana e ia – Ko wai tana tino kiripuaki? Ki ana whakaaro, he aha pea te whakakapinga?
- Pānuitia ngā tohutaka, ngā tohutohu, ngā moheni, ngā puka whakamārama, me kī, ko te huhua noa o ngā pukapuka ahakoa te pūtaka.
- Tonoa tō tamaiti kia pānui pukapuka ki ōna tēina, ki ōna kaumātua rānei.
- I te whare pukapuka – rapua ngā pukapuka e pā ana ki ngā kaupapa e ākona ana ki te kura; kōwhiri tahitia e kōrua tētahi pukapuka māu e pānui ki a ia.


Tuhituhi

I te tau tuawhā i te kura, ko te reo tuhituhi o tō tamaiti kei te taumata 2 o te marautanga.

E taea ana e tō tamaiti te āta tuhi mō ētahi pūtake whāiti, me te whai whakaaro anō ki te kaupānui. E tuhi kōrero ana anō hoki mō ētahi atu marau, pērā i te Pūtaiao, te Hangarau, te Tikanga ā-Iwi rānei. He kaha tonu ia ki te tuhituhi mō ngā kaupapa nāna anō i kōwhiri, me te mahi tahi ki te pouako ki te whakapai haere i mua i te tuku atu ki tētahi hunga kaupānui.

E ako ana tō tamaiti ki te:

- whakaatu atu i ōna wheako, i ōna whakaaro, me ngā pārongo
- tuhituhi mā ētahi kaupānui ake, pērā i te tuhi mihi ki tētahi manuhiri
- whakatika i āna ake tuhinga
- whakamahi i ngā momo pukapuka tohutoro pērā i te papakupu, hei whakatika i ngā kupu, kia mārama ai rānei te tikanga o te kupu
- whakaputa i āna ake tuhinga, mā te rorohiko, mā te kāmera, mā te pikitia, mā ngā hoahoa rānei.



I tēnei tuhinga a te tamaiti nei, kua:

- tuhia ōna ake whakaaro kia rangona tōna reo ake
- whakamahia te rorohiko ki te whakaputa i te tuhinga
- whakauru i tētahi whakaahua hei tautoko i te tuhinga
- kōrerohia tētahi āhuetanga whenua.

I te kāinga

- Āwhinatia tō tamaiti ki te: tuhi karere ki te onepū; tuhi karere hei rau ki roto i te pātara; tākaro i te 'Scrabble'.
- Whakaritea tētahi wāhi mō te pupuri me te whakaatu i āna tuhinga – ki roto kōpaki, ki roto taitapa, ki runga pouako makariri rānei.
- Māna tētahi rārangi kai hākari mā te whānau e tuhi.
- Whakamahia tētahi 'Sharpie' ki te tuhi ki runga kapu – he ingoa tangata pea, he pikitia pea – meatia ki te umu kia 200° C te weranga mō te 15 meneti kia pūmau ai.





Pāngarau

I te tau tuawhā i te kura, ko te mahi pāngarau a tō tamaiti kei te taumata 2 o te marautanga. He 60–80 ōrau o ngā mahi pāngarau, he aro ki te ako tau.

Ka whakaoti rapanga tūturu ia me te whakamahi i ōna māramatanga ki te tau, te taurangi, te āhuahanga, te ine me te tauanga. Ka whakaoti rapanga i runga i tōna mōhio ki ngā meka māmā – mō te tāpiri, te tango, te whakareatanga, me te uara tū.

E ako ana tō tamaiti ki te:

- whakamahi i ngā tau tae noa atu ki te 1,000
- whakaoti rapanga i runga i tōna mōhio ki ngā papatau whakarea o te 2, te 3, te 4, te 5, me te 10
- kimi i ngā hautau o ngā huinga/āhua/rahinga
- hanga me te kawē tonu i te taura, me te whakamārama i te ture mō te taura
- whiriwhiri me pēhea te ine tika i te roa, i te horahanga, i te rōrahi, i te kītanga, i te taumaha, i te pāmahana, me te wā
- whakamahi i ngā mahere māmā ki te whakaatu i te taunga me te ahunga.



He tauira rapanga pāngarau

Ki te tēpa ine, ine a te roa o te tohu whārangi, te anuhe, te rīpene. Kua tīhaea te tēpa ine engari he pai tonu mō te ine.

I te kāinga



He nui ngā painga o te pāngarau i ā tātou mahi o ia rā. Kua rerekē pea te whakaoti rapanga mai i te wā i a koe i te kura. Mā tō tamaiti koe e ako ki tāna e mōhio ana.

Ngā tau me ngā tauira

- Tatauria whakamua, whakamuri, ki ngā tau nui – 779, 780, 781, 782 ... 782, 781, 780, 779.
- Kimihia e hia te pakeke o tēnā, o tēnā o te whānau, me ō rātou rā whānau.
- Hangaia he tauira tāruarua pērā i te kōwhaiwhai, i te tukutuku, ka whakamahi ai hei whakarākei kāri.

Ngā mahi o ia rā

- I te hokomaha, mā tō tamaiti kē ngā kai e ine – “He aha te mea māmā te utu?”, “E hia te nui o te huka/tote/hinu?”
- Tirohia ngā pānui hokohoko – “Ko tēhea te mea māmā rawa te utu?”, “He aha/E hia ngā mea ka taea te hoko ki te \$10/\$100/\$1000?”
- Kohia ngā pouaka kārimārō – āta wetekina, ka hanga mai anō ai, hangaia rānei he mea kē anō.



Ngā mihi ki a rātou mā kua tautoko i te kaupapa nei.
Ngā mihi hoki ki te ākonga, nāna te tuhinga i te wāhanga
Tuhituhi o tēnei pukaiti.

He kōrero anō mō Ngā Whanaketanga Rumaki Māori
me Te Marautanga o Aotearoa kei te pae tukutuku o
Te Tāhuhu o te Mātauranga, www.minedu.govt.nz.

Kaitā pikitia: Ellie May Logan.

Kaihoahoa: Spencer Levine.

Ko te pukapuka i te wāhanga Pānui, ko *Te Pahi i te Pō* nā
Maraea Teepa i tuhi.

I whakaputaina tēnei pukaiti i te tau 2014
mō Te Tāhuhu o te Mātauranga e Hana Limited.

Mana pupuri © Te Tāhuhu o te Mātauranga, 2014.

Nama take: 710944

